



CONVENIO DE COLABORACIÓN ENTRE A UNIVERSIDADE DE SANTIAGO DE COMPOSTELA E O CONSELLO CONSULTIVO DE GALICIA PARA A REALIZACIÓN DE ACTIVIDADES FORMATIVAS DE PRACTICUM PARA ALUMNOS DA FACULTADE DE DEREITO

En Santiago de Compostela, a 12 de febreiro de 2004

COMPARECEN

Por unha parte o Excmo. Sr. D. Senén Barro Ameneiro, Rector Magnífico da Universidade de Santiago de Compostela (USC), que actúa en nome e representación da Universidade segundo o establecido no artigo 20 da lei 6/2001, de 21 de decembro de Universidades e no Decreto 201/2002, do 13 de Xuño, da Xunta de Galicia.

Por outra parte o Excmo. Sr. D. José Antonio García Caridad, Presidente do Consello Consultivo de Galicia, actuando en nome e representación deste Órgano.

Ambas partes recoñécense a representación e mutua capacidade de obrar

EXPOÑEN

PRIMEIRO.- Que a USC é unha Entidade de Dereito Público que desenvolve actividades de formación, investigación e desenvolvemento científico e tecnolóxico, interesada en colaborar cos sectores profesionais e socioeconómicos nos que se inserirán no futuro próximo os seus egresados.

SEGUNDO.- Que a Facultade de Dereito da USC ten establecido dentro do seu plano de estudos (2003) a realización dun Practicum de 15 créditos que se estrutura a través de prácticas internas dentro do propio centro e en prácticas externas en colaboración con distintas organizacións de carácter profesional.

TERCEIRO.- O Consello Consultivo de Galicia, como órgano superior consultivo de Galicia, ten como finalidade velar pola observancia da Constitución do Estatuto de Autonomía e do resto do ordenamento xurídico, mediante consultas e dictames de carácter preceptivo ou consultivo.



En vista do que a USC e o Consello Consultivo de Galicia acordan as seguintes

CLÁUSULAS

PRIMEIRA.- A finalidade desta colaboración é proporcionar ós alumnos que se van licenciar a posibilidade dunha formación práctica tendente a familiarizalos cos procesos e actividades que terán que desenvolver nun futuro próximo no ámbito dos seus respectivos traballos. Esta formación habilitarase a través da presenza dos estudantes nas dependencias do Consello Consultivo de Galicia nas que poidan adquirir a mencionada formación, en horarios e coas funcións que se determine pola Comisión de Seguimento.

SEGUNDA.- O Practicum estará coordinado pola Facultade de Dereito, correspondendo a supervisión a súa Decana ou persoa na que ela delegue. Por parte do Consello Consultivo de Galicia a coordinación desenvolverase a través do seu Conselleiro D. Antonio Carro-Fernández Valmayor.

TERCEIRA.- A adscrición dos alumnos deberá facerse consonte os criterios fixados polos responsables universitarios.

CUARTA.- Ó remate de cada período de Practicum os alumnos deberán elaborar unha memoria final sobre o traballo realizado. Ademais os titores responsables da entidade colaboradora elaborarán un informe sobre a actuación dos estudantes. Este informe servirá como certificación da realización do Practicum dos estudantes no Consello Consultivo de Galicia.

QUINTA.- A Universidade de Santiago comprométese a expedi-las correspondentes acreditacions ós profesionais asociados que actúen como titores no Practicum.

SEXTA .- Os profesionais titores comprométense a orientar e asesorar individualmente a cada estudante de xeito que se facilite a súa aprendizaxe nese contexto específico a través de diversas actividades, e a facilitar ós estudantes os datos e axudas necesarias para o coñecemento da realidade á que se incorporan de maneira que poidan participar nos proxectos de traballo que se están realizando.

Tamén deberán facer un seguimento formativo do alumnado que titoriza, artellando a fórmula máis axeitada para que a experiencia resulte beneficiosa para ambos e emitir informe de aproveitamento do alumnado segundo os criterios fixados polos responsables universitarios do Practicum. .

SÉTIMA.- A realización destas prácticas non supón ningún tipo relación laboral, estas non serán de ningún xeito retribuídas e non determinarán responsabilidade algunha da entidade colaboradora, xa que logo os alumnos están cubertos polo seguro escolar.



O alumnado respectará en todo momento a vida profesional da entidade a que se incorpora, especialmente coas persoas coas que establecen relación e cos recursos que utilicen.

OITAVA.- A realización deste convenio non supón contraprestación económica algunha polas entidades asinantes.

NOVENA.- Para o seguimento e cumprimento do convenio establecerase una comisión paritaria integrada por un representante da Facultade de Dereito da USC e un representante do Consello Consultivo de Galicia Esta comisión dictará as súas normas internas de funcionamento debéndose reunir cando o solicite algunha das partes do mesmo.

Terá asemade as seguintes funcións:

- 1) A interpretación do convenio.
- 2) A proposta de addendas ou modificacións ó mesmo.
- 3) Formular as convocatorias correspondentes a cada curso académico para a realización do Practicum de acordo cos criterios fixados polos responsables universitarios.
- 4) Establecer os criterios de seguimento e avaliación dos programas do Practicum.
- 5) Determinar as dependencias onde se realizarán as actividades do Practicum.
- 6) A intervención previa á resolución por incumprimento, a coordinación de funcións e calquera outra relacionada co bo funcionamento deste convenio.

DÉCIMA.-- O presente convenio entrará en vigor no momento da súa sinatura e a vixencia será de dous cursos académicos. Transcorrido este tempo, o convenio prorrogarase automaticamente por dous cursos académicos máis, agás denuncia expresa do mesmo por calquera das partes, e así sucesivamente.

DECIMOPRIMEIRA.- As partes poderán modificar o presente documento en calquera momento por mutuo acordo. Calquera das partes poderá, a súa vez, denunciar o presente acordo comunicando por escrito á outra parte con tres meses de antelación á data no que o vai dar por rematado. En ámbolos dous casos deberán rematarse as tarefas que se estean a realizar.

DECIMOSEGUNDA.- O presente acordo ten natureza administrativa. As dúbidas na súa interpretación serán resoltas pola comisión paritaria así como as discrepancias que poidan xurdir na súa execución. Das cuestións litixiosas coñecerá a xurisdicción contencioso-administrativa dado o carácter público da USC.



E en proba de conformidade de canto antecede, asinan por duplicado o presente documento no lugar e data arriba indicados.

Polo Consello Consultivo de Galicia

Pola Universidade de Santiago
de Compostela

Asdo. José Antonio García Caridad



Asdo. Senén Barro Ameneiro